
Telegram di consumadëures lugio/agost 2025

Newsletter

Wenn Sie im KonsumentInnenschutz auf dem Laufenden sein wollen, abonnieren Sie kostenlos das Verbrauchertelegramm als Newsletter.

Insolvënza FWU Life Insurance Lux (ex Atlantic Lux)

Intardiamënc da mené les domandes de ghiranza

Le team de licuidaziun cun a ce l'avocat Yann Baden lascia alsavëi che al sará intardiamënc da mené fora les domandes de ghiranza ala clientela.

Naota êl preodü da tó sö contat cun düc i interessá y da ti mené i documënc relatifs cina ai 31 de messé dl 2025. Mo indere, porvia de dificoltés de azes ai dac, ne jarára por tröc sogec interessá nia da tigní ite chësc termin.

Por le momënt laora le team a n portal por la clientela sigü, por podëi spo lauré fora domandes y comunicaziuns a na moda zentrala y digitala. Al é preodü che le portal vais en funziun da setëmbër dl 2025 inant.

Implü vëgnel lascé alsavëi che les misciuns e-mail che se röia cun @forwardyou.com ne vëgn nia plü adorades. **Chësta é la misciun de contat che vel por la Talia:** Info.it@fwulifelux.com.

Sce al ne röia nia informaziuns cina ala fin de agost, sarál da contaté la Zentrala di Consumadus (ZCS). Al é preodü na segnalaziun coletiva por tó ite düc i sogec interessá che n'é nia gnüs contatá.

Cina dailó pól gní scrit fora le formular de contat sön chësta plata:

<https://www.fwulifelux.com/servicecenter>

Al vëgn perié da s'anuzé dl formular talian y da le mené a Info.it@fwulifelux.com.

Lista di sogec interessá dla Zentrala di Consumadus

La ZCS fej na lista por ti dé ai consumadus y ales consumadësses informaziuns ajornades diretamënter tres e-mail. Che che ne s'á nia ciamó adressé ala ZCS pó se lascé mète sön la lista di sogec interessá: info-fwu@verbraucherzentrale.it

Avis de tentatifs de ingianada

Al momënt n'él degöna poscibilité da anulé debota le contrat d'assicuraziun o damané n paiamënt parzial. Sce i sogec interessá ess da gní contactá da porsones che pîta de te' soluziuns asveltes, aconsiëia la ZCS da mète averda. Al podess ester che le dër fin sides pordërt chël da vëne assicuraziuns sön la vita pro d'atres compagnies d'assicuraziun.

Meta: tosc sarál ince reclam sön WhatsApp

ZCS: dübi sön la proteziun di dac, al é aplicaziuns alternatives

I anuzadus y les anuzadësses dl sorvisc de messaji WhatsApp messará tl dagní ince fá cunt cun anzies de reclam. Meta á lascé alsavëi che ti mësc che vëgn gnarál adaldé de gre en gre l'introduziun de reclam. Le reclam gnará mostré tla seziun "Ajornamënc", olache an ti pó pormez ai canai aboná y al status di atri contac WhatsApp. La seziun di messaji dess porchël resté zënza publizité.

Che che ciara dla proteziun di dac ne vëiga nia de bun edl chisc svilups: al é prigo che WhatsApp scomënces da mostré reclam personalisé adoran dac de Facebook y Instagram, zënza avëi le consëns varënt por n tratamënt danter chëstes plataformes.

Aplicaziuns alternatives

- **Signal:** é la **miú soluziun por ci che reverda la segurëza**. So protocol codifiché garantësc che i dac di anuzadus y dles anuzadësses ne vëgnes nia dá inant a entités da defora.
- **Threema:** sorvisc de messaji **a paiamënt** che ti dá na gran importanza al'anonimité de che che l'anüza deache canche an se registrëia n'ól ester **no na misciun e-mail, no n numer de telefon**, mo ma na ID generada a caje. I messaji de Threema vëgn tuc y jüs dai servers pornache ai é gnüs consegná.

Ci alimënc á pa importancia pro les alergies incrujades?

Canche al vëgn fora n'alergia prodüj le sistem imunitar anticorps IgE cuntra la sostanza che la fej gní fora. Sce ince d'atres sostanzes cun na strotöra chimica anfat o somiënta provocheia na reaziun alergica, vëgnel baié de na reaziun incrujada o de n'alergia incrujada.

N'**alergia da stöp de flu di bedois** pó gaujé reaziuns incrujades cun: poms, përs, chersces, kiwi, netarines, persighi, sonjins, arbëies, res ghei, petersil, selarí (crüs), faus de soia, nojeles, nusc y canela.

Alimënc a reaziun incrujada pro l'alergia da **stöp de flu dl aussënt** é: carciofi, senefli, res ghei, papriches (crüs), selarí (ince cöt), avocado, kiwi, litschi, mango, ampömes, mënta y na ligna de erbes da saú (anes, basile, curry, dil, estragon, ingver, cardamon, ai, coriander, ciarí, erba da maggi, maioran, nusc moscada, origano, peperoncin, petersil, porvada, senf, timian y canela).

Les porsones che á n'**alergia da stöp de flu de erbes** pó ince avëi na reaziun al formënt y ala siara nia cöc, ales arbëies, ai babagigi, ales linses, ales faus de soia y ai pomodori.

Pro n'**alergia da stöp de flu dl'ambrosia** pó les alergies incrujades gní dant cun bananes, mangos, meluns, gurches, zuchins, ampömes y sorëdli.

Deplü arbassamënc dla spana di fic da pert dla banca Zentrala Europeica (BCE): ci ó pa chësc dí por che che á tut sö n credit tl Südtirol?

Na odlada al svilup di ultimi dodesc mëisc mostra che sides la spana di fic de referimënt dla BCE co l'Euribor a 6 mëisc é jüs jö da plü dl 4 % a presciapüch le 2 %.

La Banca Zentrala Europeica á arbassé ai 5 de jügn dl 2025 por le setimo iade la spana di fic dal isté dl 2024 incá. I fic sön i deponimënc é gnüs smendris dal 2,25 % al 2,00 %, le porcënt di fic dl refinanziamënt prinzipal - chël ó dí le porcënt di fic zentral - é jü jö dal 2,40 % al 2,15 %.

Chësc smendrimënt di fic á faziuns desvalies sön la clientela dles banches. Deperpo che i sparagnadus y les sparagnadësses mëss fá cunt cun rendimënc che cara sön deponüdes de scioldi che an á tres a desposiziun y ince sön deponüdes vincolades – na tendënza che vá inant bele da mëisc – á che che á tut sö n imprëst, dantadöt che che á n imprëst cun fic variabli n vantaje, porvia dles bones condiziuns.

Por tröpes families dl Südtirol él bindebó relevant deache le porcënt di fic se adatëia vigni sis mësc al parameter de referimënt p.ej. l'Euribor 6 mëisc - de regola al 1. de messé y al 1. de jená.

La clausola di fic dess gní controlada: dailó él scrit dant avisa ci adatamënt che al vëgn fat y can. Cun chëstes informaziuns vára da controlé cun n calcoladú (p.ej. <https://www.zinsen-berechnen.de/kreditrechner.php>) ci consequënzes che la variaziun dl porcënt di fic á sön le credit.

N ejëmpl pratich: <https://www.consumer.bz.it/de/wiederholte-leitzins-senkungen-durch-ezb-was-bedeutet-das-fuer-suedtiroler-kreditnehmer>

Les baujies dles dietes da tó jö che vëgn dant le plü gonot

Tó jö le plü che ara vá tl manco tēmp poscibl? Tla publizité fej crēi les insciödites "diètes tarlí" o les "diètes crash" che ara vá da tó jö tröp te dēr püch tēmp. Mo indere sce do la diēta mēton indô man da mangé sciöche an ê ausá denant, tolon dēr gonot indô sö. Chēsta faziun vára ma da schivé sce an ciara da tó jö bel plan, da mez chilo a n chilo al'edema. An pó le fá te na manira sana sce an fej na diēta integrála da püces calories.

Tó jö de pēis cun mesi miracolusc? Al pé che tröc mesi speziai sciöche jopa da capüc, polber basich, cures detox y pilores che brüj grasc fejes perde chili dēr debota. Cun le tēmp indere vëigon i desvantaji de chisc mesi miracolusc, danterater i cosc alc, la mancianza de resultac, n'alimentaziun nia ecuilibrada y la faziun yo-yo.

Tó jö lascian demez le patüc da mangé che fej ingrassé? Regoles dietetiches massa rigoroses y proibiziuns da mangé certo patüc provochēia indere a tēmp mesan na fan da lu y lascia caré la motivaziun. Al é plü d'ütl fá na diēta da na gran varieté, ecuilibrada y cun püces calories.

Tó jö cun orars rigorusc por i pasc? Sigü él che l'"ora che i un daite" á n influ sön nosc metabolism. L'orar di pasc n'é indere nia ma le su fatur che influenzēia le pēis dl corp.

Na diēta por dōtes les porsones? Al n'é nia n plann da tó jö che vá bun por dōtes les porsones. Les porsones é desvalies, ares á usanzas individuales, priorités, (in)toleranzas, preferēnzes, patüc a chël che ares ne ti un impó nia, bojègns da vigni de, capacités desvalies y ince desponibilités economiches desfarēntes. N plann da tó jö da faziun mēss porchël gní adaté a vigni singola porsona.

Cun l'auto cuntra nord?

Metede averda ala vignēta y al daz

Consumadus y consumadēsses nes segnalēia tres indô che al ti é rové na straufunga da pert dla sozieté de autostrades ASFINAG deache al n'é nia gnü cumpré la vignēta o ara n'é nia gnüda adorada sciöche al toca.

Recordesse: Che che vá cuntra nord cun l'auto mēss naota paié da passé sura "l'Europabrücke" - n daz ma por chël toch de strada. Cun chësc pón jí cina Desproch Süd.

Che che vá inant da dailó cuntra nord mēss ince ciamó cumpré la vignēta:

- Les **vignētes por n de o por diesc dis y i dac por toc de strada pó gní cumprá online** cina al menüt canche an rōia sön l'autostrada (damí él sce al é n pice pü' de liberté d'aziun). Ince sön certi posc de palsa sön l'autostrada pón cumpré na vignēta digitala. Controleda avisa che al sides bëgn gnü dé ite indortōra la targa de osc auto, deache an ne ciafa nia na cubita olache al é da odēi le numer de osta targa.

- Les **vignëtes online che döra plü dî (2 mëisc, n ann ...)** mëss gní cumprades almanco **14 dis denanco pié ia**, deache chiló tomel le termo de retrata por cumpres online. **Porchël recordesse:** cumprede adora assá la vignëta, dede dant indortöra le codesc dl Paisc y la targa dl auto deache i systems de control automatic é dër avisa.
- Che che cumpra **la vignëta classica che taca** mëss sambëgn la taché sö sciöche al alda por ne cialfé nia na strafunga (n codesc QR sön la vignëta ves coliëia a n video de spligaziun).

Smartphones:

Al vá en forza les regoles dl'UE nöies sön l'etichëta energetica y le design ecologich

Dai 20 de jügn dl 2025 incá velel ofizialmënter les desposiziuns europeiches nöies che müda completamënter la manira sciöche smartphones y tablets mëss gní proietá y venüs, sciöche ince les informaziuns por i consumadus y les consumadësses che mëss ester lapró. Ara se trata di Regolamënc delegá (UE) 2023/1669 sön l'amersciadöra energetica y 2023/1670 sön les ghiranzes dl design ecologich. Le fin de chisc provedimënc é da arlungé la vita di despositifs, da sauridé süa reparaziun y da smendrí la faziun ambientala dl refodam eletronich.

Ci vëiga pa danfora chëstes regoles nöies?

Düc i modei de smartphone y tablet nüs che röia sön le marcé europeich mëss avëi n'**etichëta energetica obligatoria cun chëstes informaziuns:**

- la classa de efiziënza energetica (da A a G)
- la dorada dla patrî te condiziuns standard (te ores y menüc)
- la resistënza canche le despositif toma ia por tera por caje
- le numer garantí de ziclus de ciariada (al mëss gní garantí almanco 800 ziclus de ciariada, denant che la capacità dla patrî vais sot al 80%)
- la classa de proteziun cuntra stöp y ega (IP)
- l'indesc de reparatöra, la poscibilité da le tó en toc, la desponibilité di toc de sostituziun, les istruziuns y les massaries che an adora
- n codesc QR, por ti podëi pomez ala scheda tecnica dl produt.

I produturs mëss garantí sorvisc de reparaziun profescionala **por almanco set agn** dala data dl'ultima comercialisaziun y ti assiguré ai consumadus y ales consumadësses la **poscibilité da cialfé da cumpré toc de sostituziun importanc**. Implü mëssel gní metü a desposiziun **les istruziuns de reparaziun y les informaziuns tecniches**.

Assiguraziuns sön i frabicac

Al é preodü na detraziun fiscala por les curides cuntra catastrofes naturales

Dal 2018 incá él la poscibilité da trá jö dala cuta le 19% dles spëises por les assicuraziuns sön i frabicac cuntra i risc de evënc de catastrofes (cod. 43 dl model 730).

La detraziun ne reverda de regola nia le 19% de döta la premia, mo ma chë pert adebitada por curí le risch spezifich.

La detraziun ti speta ala persona assicurada, bel anfat sce ara é la proprietara dl frabicat curí dala poliza.

Dal 2020 incá ti vëgnel conzedü ai titolars de n davagn compressif cina 120.000 euro da trá jö integralmënter dala cuta brutto les premies d'assicuraziun cuntra evënc catastrofics. Sura chësc limit s'arbassa la detraziun cina che ara röia a nul cun n davagn complessif de 240.000 euro.

La detraziun fiscala vëgn conzedüda sce le paiamënt é gnü fat cun n meso de paiamënt a chël che an pó ti jí do.

Por tröc contribuënc é i 30 de setëmbër l'ultimo termin por presenté la detlaraziun dl davagn.

Pestizig prigorusc por la produziun de poms tl Trentin-Südtirol?

No, giulan!

Tles ultimes edemes á le grup volontar **Stop-Pestizide Alto Adige/Südtirol invié ia na petiziu che ghira che al vëgnes proibí cater pestizig chimich-sintetics**. Chëste sostanzes é danoses por la sanité y l'ambiënt, y ares vëgn adorades tl Trentin-Südtirol tla coltivaziun di poms.

Che che oress nen savëi deplü o sostigní chësta petiziu pó le fá (mo ma un n iade, chël ó dí o la verjiun taliana o chëra todëscia) sot a: <https://chng.it/4GxZnz52tv>.

Vigni sotescriziun porta pro a ti dé n majer pëis ala ghiranza y a sburlé les autorités competëntes a fá valch. Vigni sostëgn cunta!